

四庫全書

子部

欽定四庫全書

唐開元占經卷二十

唐 瞿曇悉達 撰

五星占三

歲星與熒惑相犯一

郝萌曰歲星熒惑陽也太白辰星陰也陰主外邦陽主中邦陽與陰合中外邦相連以兵陽與陽合兵謀在國陰與陰合兵謀在外邦 甘氏曰歲星干熒惑為地動

熒惑干木星蟄蟲冬出動雷旱行禾不成 荊州占

曰熒惑犯歲星為戰

按宋書天文志曰晉大安三年正月熒惑犯歲星七月衛將軍陳賡

率眾奉帝伐成都六軍敗績賡擅兵逼象興九月壬戌又攻成都于鄴鄴潰成都由是衰亡帝遷洛張方又脅

如長安也

荊州占曰熒惑犯歲星冬雷鳴蟄蟲行人民驚

恐又曰熒惑當出不出謂之潛行見而近歲星出其北

天下有急出其南有謀在中 又曰歲星與熒惑接芒

於西方諸侯君臣有憂其明年春害農時與歲星會於

東方日為之食不出二年宰相亂人主之計不定乍退

乍進不出三年大兵起 歲星與熒惑同舍相去三尺  
以內相守七日以上至四十日其國有反臣五穀傷百  
姓不安期一年 天官書曰木火合為旱為飢戰北軍  
困 歲星與熒惑合柳歲星色赤兵起黃白五穀傷黑  
為憂青而角亦有兵起期三十日遠期六十日 歲星  
與熒惑合相守國君大憂近期二年遠期三年而發  
歲星與熒惑合於宿之陽母子同鄉其國寧合於宿之  
陰有兵起 歲星與熒惑合相守其國凶消十日以上

大人作亂期三年木與火合大臣匿謀有反者若王亡地其國水 司馬彪天文志曰歲星與熒惑合於虛為喪 石氏曰熒惑與攝提再合宿相不死出走 海中

占曰熒惑與木星合為內亂大臣謀主 荊州占曰熒

惑與歲星合大臣匿謀行疾兵從之戰不勝 熒惑與

歲星合同相守其分走期三年 熒惑與攝提再合有

走主謂東行合西行又合不出二年 司馬彪天文志

曰熒惑犯歲星為姦臣謀大將戮 石氏曰熒惑與歲

星合其國若水 熒惑與歲星聚於一舍熒惑在歲星之上名曰子母同光其國日以大強留百日其國且重德致天下在下亦然 海中占曰熒惑木星鬪有夷狄之害有殺大將 天官書曰歲星與火合鬪者大臣弑其君子弑其父 荊州占曰熒惑與歲星鬪其名曰讒星不出其年強國有易相又曰為內亂 文耀鉤曰熒惑與木鬪夷狄肆虐 荊州占曰熒惑歲星合鬪於夏兵飢並起其分相凶不可舉兵殃大將一曰有病君

歲星食熒惑不出三年而國亡 海中占曰熒惑貫歲  
星殺小將 石氏曰熒惑與歲星相拂天下有爭言  
漢天文志曰熒惑與木鬪有病君民飢歲惡 荊州占  
曰熒惑守歲星大赦

歲星與填星相犯二

石氏曰地侯雌雄所出之宿國亡地所入之宿國得地  
地侯為雌歲星為雄 郝萌曰填星干木星野有兵相  
攻 填星所在歲星從之伐者利 荊州占曰歲星所

在填星從之伐者不利又曰歲星土星皆出東方夕入西方百九十日皆正中者兵發東方國勝當入不入反東行九十日正中者當發兵主死人民流亡文曜鉤曰填星與木星合則變謀更事主且失勢石氏曰地侯與攝提所合之宿大戰不勝亡地主死甘氏曰歲星

土星合則為內亂

按宋書天文志曰晉光熙元年九月填星犯歲星是時司馬越專權終以

無禮晉簡文帝咸安二年正月己酉歲星犯填星在須女七月帝疾甚詔桓溫曰少子可輔則輔之不可輔君自取之顏侍中王坦之毀手詔改使為王導輔政故事溫聞之大怒將誅坦之等內亂之應也安帝義熙七年



丁卯歲星犯填星在參邊時朱齡石尅蜀蜀民人尋反又討滅之

郝萌曰歲星與填

星合於張者則太陽晝太陽晝者天必有變不傷為政者則害于民 又曰井泉高而平原出雲歲不調和貴人多內亂有大水 又曰天下易令民流千里魚鰲死于陸道民憂盜賊 又曰歲星與土星合不過十日離十日不離天禍且降不義者乃合之其禍甚久 天官書曰填星與木合亂饑生勿用戰必敗 荊州占曰歲星與填星同舍相去三尺以內相守二十日以上至百

九十二日其國更主立王天下大爭大臣相殘王者易  
統天下存亡半其守夕逆行而復相守以所近之宿位  
當之相守一年期三年 歲星填星合以合日占其國  
色蒼為水赤為兵黃為旱白為喪 歲星與填星合其  
國熟若主吏死 填星與歲星合相犯為內亂不可舉  
用兵土在木下利為主人土在木上利為客六十日不  
下其國凶失地 填星與歲星合一舍歲星在下填星  
在上名曰雌雄間客軍大破主人勝在下六十日不下

必有空邦徙主填星為雌歲星為雄 填星與歲星合  
為飢為旱為兵填星與歲星合有軍在外戰不勝失地  
巫咸曰填星與歲星鬪不出其年王者亡地將軍死  
之 荊州占曰歲星與填星鬪此謂離德不出三月必  
有亡國 歲星逢填星曰鬪先作事者敗兵起必受其  
殃歲星填星數合鬪使客接道冠蓋相望其下國哭泣  
期不出六十日歲星填星鬪其色青為喪赤為兵白為  
旱黑為水潦 填星與歲星合鬪有軍必戰無軍起兵

土木交行必有破傷

歲星與太白相犯三

巫咸曰太白犯木星為飢期三年

按宋書天文志曰晉孝武太元十年十二

月己丑太白犯歲星是時河朔未一連兵在外冬大飢之應

荊州占曰太白犯歲

星為旱為兵若環繞與之并光有兵戰破軍殺將石

氏曰太白與歲星相犯而有滅者諸侯相滅所宿之國

受之 甘氏曰歲星干金星軍再死再生殺大將荆

州占曰太白入木星次中君賊死 海中占曰太白出

歲星北客利歲星出太白北主人利 荊州占曰太白

環繞歲星有亡主 甘氏曰太白與歲星並太白在南

歲星在北名曰牝牡相承五穀成熟太白在北歲星在

南年或有或無歲不熟飢

晉灼曰歲星陽太白陰故曰牝牡又曰太白在歲星南以

兵飢在歲星北以水飢一曰有亡國

又曰歲星太白相去尺若不能天

下有兵不出四旬中戰色青則東方勝赤則南方勝黃

即中央勝白則西方勝黑則北方勝 歲星所在太白

從之伐者利有功太白所在歲星從之伐者不利無功

歲星與太白相遇有兵兵罷 太白與歲星過木金  
也命曰伐其野戰入太白中次中大將必死 太白歲  
星俱出東方若并入西方王者亡地 洪範傳曰金木舍  
於觜為白衣之會 黃帝占曰歲星與太白合為飢為  
疾為內兵 文耀鉤曰太白與木合光大戰不勝兵雖  
起不成 天官書曰不鬪合相毀野有破城 荊州占  
曰歲星太白合光所合之野謀兵其相環也乍居西乍居  
東有逐相兵起不戰 又曰歲星犯太白為誅死外將

軍慎之無將軍不出四十日拜將軍期九十日 歲星

與太白同光殺大將相去一尺天下治兵不出四十日

石氏曰太白與歲星合于一舍西方凶歲星出左有

年出右無年合之日以知五穀之有無

陳卓曰甲乙為  
麥丙丁為黍戊

己為粟庚辛為

稻壬癸為菽

巫咸曰太白與木星合有白衣之會

為水 荊州占曰歲星與太白合為喪歲星與太白同

舍相去三尺以內七寸以外金木不當同舍七日以上

王者誅將軍其歲星往犯太白為誅死國有將軍慎之

乘犯於外官之中則外將軍慎之乘犯於內官之中內將軍慎之其國無將軍而犯太白不出四十日拜將期九十日歲星與太白合於東方名曰牝牡歲星在北太白在南陰陽和為年豐太白歲星合於西方木在金位命曰伐其國凶為白衣之會木在金北年不熟歲星

與太白合其分兵起

按宋書天文志曰魏明帝太和四年十一月壬戌太白犯歲星五年

三月諸葛亮以大衆寇天水遣大將軍司馬懿拒退之晉元帝大興元年八月乙未太白又犯歲星三年六月丙辰太白與歲星合永昌元年三月王敦率江荆之衆來次京都大軍拒戰敗績于是殺護軍將軍周顗尚書令



刁協驃騎將軍載淵又鎮北將軍劉隗出奔四月又殺  
湘州刺史譙王承鎮南將軍甘卓晉陽秋曰孝武寧  
康二年二月丙申太白犯歲星太元元年九月元帥符  
堅屠涼州擄刺史西平侯張天錫冬十月車騎桓伊遣  
軍汎舟淮泗以救涼州又發二州員吏移積流民悉置  
淮南太元五年辛卯歲星與太白相犯於東井十二月  
元帥符堅  
圍襄陽

荊州占曰太白居歲星南南國敗居歲星

北北國敗 歲星出隨太白於西方相遠天下無兵

太白與歲星合未至太白從歲星疾主人急憂失城歲

星從太白疾客急 太白與歲星合其國有謀兵一曰

金木合於一舍其分有蝗太白與木星會相去五尺戰

三尺有破軍二尺拔國光芒相及大亂其分民飢兵起  
司馬彪天文志曰歲星與太白鬪其野有破軍國有  
內亂 荊州占曰歲星與太白鬪西方八日兵起不則  
八歲兵起有流血其下 黃帝占曰太白與歲星鬪強

國易相 石氏曰太白與歲星鬪所在之國有內亂

文耀鉤曰太白與歲星鬪將軍殺若軍在外破軍殺將  
有夷狄害 巫咸曰太白與歲星鬪名雄無戈兵 太  
白與木星合鬪兵在外為亂 荊州占曰太白與歲星

鬪相亂有滅諸侯人民離其鄉一曰民多死者 歲星  
逢太白曰鬪有土功歲旱天下大飢先舉兵不勝必受  
其殃 太白與歲星合鬪於東方有兵于外必有戰鬪  
於西方必有亡國死王白衣之會

歲星與辰星相犯四

司馬彪天文志曰辰星犯歲星為兵 荊州占曰辰星  
與歲星合而犯之為隕霜若合而鬪其國亂 歲星與  
辰星合相去七寸而交芒相接七日以上至二十日天

下民流水泉涌出期三年一曰有女喪 郝萌曰歲星  
干辰星冬泄疾 荊州占曰歲星掩辰星客將死期不  
出其年 黃帝占曰歲星與辰星合則為變謀而更事  
國多水民飢 荊州占曰歲星與辰星合舍相去三尺  
相守七日以上其國君臣俱和道德相生期百八十日  
有衣榮 歲星與辰星合先起兵者凶後起兵者吉  
辰星與歲星合其分有水兵飢並起 甘氏曰歲星與  
辰星合鬪軍在外則有戰兵兵不在外為內亂 郝萌

曰歲星辰星鬪滅之殺大將薄之貫之殺偏將 荊州  
占曰歲星與免星鬪將軍死期一年

唐開元占經卷二十

欽定四庫全書

唐開元占經卷二十一

唐 瞿曇悉達 撰

五星占四

熒惑與填星相犯一

巫咸曰熒惑犯填星兵大起

按宋書天文志曰晉穆帝  
升平二年八月戊午熒惑

犯填星三年十月諸

葛攸舟軍入河敗績

荊州占曰熒惑與填星合而犯

大將軍為亂若守之女主凶期三年 司馬彪天文志

曰熒惑犯填星大人忌 春秋緯曰熒惑干填星大旱  
荊州占曰熒惑入填星中將軍為亂 文耀鉤曰主  
喜不失政則熒惑與填星相扶 荊州占曰熒惑去填  
星而復歸環繞之不出六年中國亡主又曰為獄事

石氏曰熒惑與填星會主走出 巫咸曰熒惑與土合

是謂內亂 班固天文志曰土與水合為壅沮

晉灼曰水性壅

而溺土故曰壅沮一曰壅填也 不可舉事用兵又曰國亡地 郝萌曰

熒惑與填星合其國爭者坐之又曰熒惑與填星環繞

之不出三年天子失位又曰熒惑與填星合女子坐之  
文耀鉤曰填星與火合則大旱陽行害又曰火與土  
合憂主孽祥 石氏曰填星與火合大人惡之 海中

占曰填星與熒惑合女子為天下害 郝萌曰填星與

熒惑合為禍喪其國不可舉事用兵必受其殃

按司馬彪天文

志曰孝順帝漢安二年六月乙丑熒惑光芒犯填星明年八月孝順帝崩孝冲即位明年正月又崩 荆

州占曰填星與熒惑合土在火上他兵加之必有尅土  
在火下各不動者名曰子母同光其國得地猛強若同



上下民有逆心其分兵起更王 石氏曰地侯與熒惑

所合宿戰不勝國飢

按宋書天文志曰宋武大明五年正月火土同在須女占曰女主惡

之三月孝穆皇  
后崩此其應也

石氏曰熒惑從填星聚于一舍名曰

大陽其下國且有重德致天下期在十年 文耀鉤曰

熒惑與土鬪則子弟亂 平咸曰填星與熒惑鬪不出

其年有亡國 郝萌曰熒惑與土合鬪兵起近期十五

日中期三十日遠期六十日 荊州占曰填星與熒惑

合鬪必有叛臣為亂有兵起期不出二年又曰熒惑與

填星鬪不出三年有亡國 又曰熒惑與填星鬪王者  
亡地將軍死之 又曰填星與熒惑合相守主以孽為  
憂其下國失地若有圍邑 又曰熒惑與填星相守為  
憂喪 石氏曰熒惑守填星旱一日兵大起

熒惑與太白相犯二

荊州占曰熒惑與太白相犯大戰太白在熒惑南南國  
敗在熒惑北北國敗 文耀鉤曰熒惑從太白軍憂離  
之軍却出太白之陰有分軍出其陽有偏將之戰當其

行太白逮之破軍殺將 荊州占曰熒惑太白相犯為  
兵喪為逆謀 甘氏曰熒惑干太白草木傷華妨政 石  
氏曰熒惑與太白會為鏢 荊州占曰太白熒惑合去  
之一尺曰鏢其下之國不可舉事用兵必受其殃 荊  
州占曰熒惑入太白將軍戮 海中占曰與熒惑合金

從火有兵罷火從金兵大起

按張璠漢紀曰初王師敗於河陽欲浮河東下太史

令王立曰春太白犯填星于斗過天津熒惑又逆行守  
北河不犯也由是遂渡北河將自軹關東出立又謂宋  
開鄧艾曰太白守天關與熒惑會金火交金草之象也  
漢祚終矣晉魏必有興者後立數言于帝曰天命有去

就五行不常旺代火者土也永漢者魏也能安天下者  
曹姓惟委任曹氏而已公聞之語立曰知公忠于朝廷  
然天道深遠  
幸勿多言

荊州占曰太白與熒惑遇是謂金入火

有兵兵罷國安無禍 海中占曰熒惑太白合野有破

軍將死

按班固天文志曰孝景後元年五月壬午火金會合于輿鬼之東北不至柳出輿鬼北可五寸

丙戌地大動鈴鈴然民大疫死棺貴至秋止 司馬鹿

天文志曰孝殤延平元年正月丁酉金火在婁金火合

大人憂是歲八月

辛亥孝殤帝崩

荊州占曰熒惑與太白合主人兵

不勝又曰所合國野有殃二旬四五日兵過其野三旬

四五日兵宿其野三月不去其國亡 又曰熒惑與太

白合同舍其分有兵戰相離則軍離

按檀道鸞晉陽秋曰孝武寧康二年

十一月癸酉太白掩熒惑在營室時桓石虔破氐賊姚萇於盤江

又曰熒惑秋與太

白合其國不可以舉兵反受其殃

黃帝占曰熒惑太

白俱入斗不出其年國亂有憂又曰熒惑入東井太白

隨之兵喪並起

郝萌曰熒惑入東井太白隨之將若

相死一曰君死又曰糴貴

荊州占曰熒惑入東井太

白隨之道上多死人

陳卓曰熒惑入東井太白隨之

百川皆溢

韓楊曰熒惑太白接皆赤而芒三十日舍

天津關河不渡諸侯不通其君死之 石氏曰熒惑與  
太白相隨西行熒惑舍天門西太白舍天門中一曰舍  
天津人主無出國門 荊州占曰太白從熒惑聚于一  
舍熒惑在上名曰乘太白其歲多兵不用其國將以武  
致天下逆行兵起 石氏曰熒惑太白所守之宿在東  
方女勝男 海中占曰熒惑太白中上出破軍殺將客  
勝 荊州占曰熒惑入太白中五十日將死 又曰熒  
惑與太白相入而不出其國亂有憂 又曰熒惑出

太白之左左軍戰左將勝出其右右軍戰右將勝又曰  
出太白之左小戰出太白右去之三尺軍小敗黃帝  
兵法曰熒惑出太白之陰若不有分軍必有他急分大  
軍也 荊州占曰熒惑所在太白從之伐不利無功太  
白所在熒惑從之伐者利有功 石氏曰熒惑往從太  
白聚於一舍太白為失明熒惑赤色而光環繞太白所  
守之國大兵起 荊州占曰太白與熒惑遇是謂金入  
火有兵罷無徭役又曰太白在熒惑之上所聚之國且

以義致天下若在左右名曰秋兵其國必大敗 又曰  
熒惑在太白前後左右成戰客勝 又曰太白出熒惑  
之東不出三月兵起又曰太白居熒惑之後而相及破  
軍殺將 又曰太白上居熒惑上復下居熒惑下有反  
者 宋武兵法曰太白熒惑一南一北為死喪 郝萌  
曰太白乘熒惑軍敗隨熒惑軍憂 又曰熒惑太白合  
而太白起角芒而光居熒惑之上其國且有用兵三十  
日不去天下三年兵起六十日不去下有空國死主



荊州占曰太白與熒惑相留十日如去有兵大戰其不滿十日有兵而不戰期不出一年中 又曰熒惑環太白大將死 文耀鉤曰熒惑方行太白環之破軍殺將石氏曰熒惑薄太白亡偏將 荊州占曰熒惑從太白下上抵太白不入軍急不戰又曰熒惑正抵太白不去客將死 又曰熒惑摩太白下破軍主將死 又曰熒惑摩太白有數萬人戰軍敗人主死 又曰太白貫熒惑亡偏將 春秋緯曰熒惑與太白相逢而鬪勝太



又曰熒惑與太白鬪諸侯王有喪若離國若多口舌  
有內疾人民尚伐好戰殺大將歲大飢 又曰熒惑與  
太白鬪不出三年易相 又曰春太白與熒惑鬪亡君  
之戒也夏鬪不出三年名山破冬鬪不出其年有大喪  
一曰女喪 郝萌曰熒惑守太白北太子終若皇子終  
守其南嬖人死若季子死居東西亦然若相死皆期三  
月 荊州占曰太白與熒惑相守其間容斧血滿其野其  
間容矛有血流久相守血盈滿

熒惑與辰星相犯三

劉向洪範傳曰火水合於斗不可舉事用兵必受其殃

按洪範天文星辰變占曰漢景帝初元年十一月熒惑與辰星合于斗後三年吳王濞變七國同舉兵反漢太尉

周亞夫敗之

荊州占曰熒惑與辰星秋合有兵冬合有喪

又曰熒惑與兔星合東方兔星白而火兵在外削地

為和又曰熒惑與辰星合大水交行其國不可以先起

兵合於東方臣謀其主合於西方不出九十日其國宮

中有事又曰熒惑與辰星合於尾箕其國大臣凶春

夏為兵秋冬為喪凶 郝萌曰熒惑與辰星在尾箕相

近天下將大赦 又曰熒惑與辰星處虛北冬雷雨水

流忌甲子 石氏曰熒惑與辰星合為水必飢舉事用

兵有內亂 又曰熒惑與辰星相去三尺大人當之一

曰天下大赦 又曰免星與熒惑會冬為刑他時為淬

晉灼曰火入水故曰淬也 其下之國不可舉事用兵必受其殃 天官書曰

為喪 甘氏曰免星十火星雨電上即妨太子嬖人下即

妨太尉司馬 荊州占曰辰星與熒惑合而相守水火

亂行國有兵喪若不有兵疾疫流行

按班固天文志曰  
孝景五年四月乙

巳水火合於參其

年四月梁孝王死

荊州占曰免星與熒惑合其國大

旱赤地千里又為飢將行舉事大敗有覆軍殺將 陳

卓曰免星與熒惑合其國主出走 又曰熒惑所在辰

星從之伐者利有功辰星所在熒惑從之伐者不利

又曰熒惑與辰星相過是謂不祥不可用兵命曰自伐

一曰野有兵不戰兵在外亦罷 文耀鉤曰辰星抵觸

熒惑展轉復離而合河漂山天雨蛤國主哭於宮 荆

州占曰熒惑薄辰星抵之貫之殺偏將 文耀鉤曰熒惑與水鬪則以暴敗 班固天文志曰火與水合為北軍角 荊州占曰火與水合鬪女子為天下害 又曰熒惑與辰星鬪相毀敗也則有外兵不即內亂其國鬪東方臣伐王鬪西方期九十日強國宮中有亂 又曰熒惑與辰星鬪辰星滅將死又曰熒惑與辰星合鬪其國內亂有兵起其分凶

唐開元占經卷二十一

欽定四庫全書

子部

唐開元占經卷二十六

詳校官中書臣李杲

靈臺郎臣倪廷梅覆勘

總校官編修臣王熙緒

校對官庶吉士臣潘曾起

謄錄監生臣任楫文



欽定四庫全書

唐開元占經卷三十二

唐瞿曇悉達撰

五星占五

填星與太白相犯一

石氏曰太白干填星敗殃五穀不熟惟饑之亡 文耀

鉤曰填星與金合則為白衣會 春秋緯曰填星與金

合為水 石氏曰地侯與太白所合之宿國亡地

荊州占曰填星與太白合太白在填星南名曰牝牡年穀熟在填星北歲徧無饑 又曰填星與太白合一舍太白在上填星在下名曰并光逆也不出三年有兵民流 又曰填星與太白合在金北去之七寸母子同光義讓而行年穀登人主壽 又曰填星與太白合相守為兵饑疾疫不出三年下有流民 石氏曰填星與太白俱入營室中天下且有謀兵 郝萌曰填星與太白合斗光芒相接相為亂 甘氏曰太白與填星合為疾

為內兵

案宋書天文志曰晉惠帝光熙元年十二月癸未太白犯填星是後河間王為東海王越所殺

明年正月東海王越殺諸葛玖等五月沒桑破馮嵩殺東燕王八月荀晞大破汲桑穆帝永和十二年七月丁卯太白犯填星在柳七度其年八月桓溫破姚襄於伊水定周之地

荊州占曰太白與

填星合填星色蒼為春多死亦為兵黃為旱 又曰太

白在填星北一尺女主不用事在填星南一尺女主死

又曰太白環繞填星將治兵必增土 焦延壽曰填

星與太白俱出國得地 荊州占曰填星太白相近數

十日間不相去有奸太后 文曜鉤曰主任恣則太

金史卷八十二  
白觸填星 荊州占曰填星干太白水草木死 文曜

鈞曰太白觸填星發大兵相殘賊 巫咸曰太白與填

星開期九十日其君憂王者亡地若有兵與喪更立王

公 荊州占曰填星與太白合閭臣謀主有兵起其國

失地

填星與辰星相犯二

荊州占曰填星干辰星冬虹雷行夏寒雨雹隕霜 甘

氏曰水干土夏寒而雨雪妨女主 荊州占曰辰星犯

填星夏多寒霜秋多淫雨女主見放一曰女主有憂

石氏曰地侯與免星合於東方免星色白而大天下有

兵於外裂地相賂為和五行傳曰漢文帝後七年

十一月戊戌填星辰星合於危齋分占曰為壅沮若得

水為懷所當之國不可舉事用兵必受其殃將有覆軍

後三年齊王舉兵應吳楚吳楚敗而自殺之應也天

官書曰土與水合為壅闕有覆軍其國不可舉事出亡

地入得地

謂所出宿所入宿也

又曰土與水合則變謀而更事

文曜鉤曰免星與填星合內亂饑勿用戰 石氏曰浼

星與填星合為壅沮所當之國不可舉事用兵必受其殃

甘氏曰免星與填星合有敗軍死將 海中占曰辰

星與填星合在虛中秋水出

案檀道鸞晉陽秋曰孝武太元五年七月丙子辰星

犯填星冬十月丹陽平陵義興水災六年六月揚荊州江大水

郝萌曰辰星與填星

合有陰謀者 又曰辰星與填星合虛中齊國地動

荊州占曰辰星出而與填星會主令不行 石氏曰辰

星 填星會者國有土功田役非法奸臣所為誅之吉

郝萌曰填星所在辰星從之伐者不利 荊州占曰  
辰星所在填星從之伐者利有功 又曰填星與辰星  
為雌雄俱入之宿其國得地俱出之宿其國失地 黃  
帝占曰填星與澆星鬪東方臣伐君鬪西方期九十日  
強國宮中有亂事 荊州占曰填星與辰星合鬪軍在  
外必戰無軍為內亂 又曰辰星與填星合鬪其國有  
兵水土相從關梁不通其分亂

太白與辰星相犯三

石氏曰太白干辰星西方有人東方大虛有殃及匹夫  
甘氏曰辰星干太白魚不為化 荊州占曰太白出  
東方辰星出其下謂在太白東方太白出西方辰星出  
其後謂在太白西方太白辰星以初出為先後 又曰  
太白出東方辰星亦出東方太白先出辰星後出辰星  
上過太白而去臣倍其主者不出其年 又曰太白辰  
星同日出於東方東方有兵同日出於西方西方有兵  
天官書曰辰星不出太白為客其出太白為主人



荊州占曰太白辰星更迭出入以為主客太白出而辰星不出太白為客辰星出而太白不出辰星為客而金水俱不出熒惑為客無主人有兵雖盛不合戰黃帝兵法曰太白與辰星俱出東方西方國大敗俱出西方東方國大敗若客主人俱出軍在東方東方軍敗在西方西方軍敗言其表面軍也在表者不善不獲已軍堅守可也石氏曰辰星與太白俱出東方皆赤而角倍海國大敗中國大勝其與太白俱出西方皆赤而角中

國大敗倍海國大勝

倍海國夷狄也

一曰皆黑色水國利荆

州占曰太白辰星俱出東方俱出西方客主相見有軍

必戰無軍起軍

又曰太白出辰星右走居太白前主

人小利逐入之主大利太白出辰星左走居太白前客

小利逐入之客大利留有兵兵罷

又曰太白出辰星

北客利辰星出太白北主大利并出東方利以西伐并

出西方利以東伐

又曰太白出辰星居其後二十日

兵起辰星居其前十五日兵罷居其右去之三尺有軍

必戰客將死居其左兵

闕

一人吏死

又曰辰星居太白

前則兵罷居後則兵起居陽則利客居陰則利主人

石氏曰辰星居太白前旬三日軍罷出太白後兵起

荊州占曰太白與辰星遇太白避之主人畏客又曰天

下有兵太白在東方辰星居其前而不去十五日若二

十日而入陰兵滅不大戰辰星去兵罷又曰天下有兵

辰星在西方居太白之前十五日若二十日而入陽兵

滅客去又曰天下無兵辰星太白俱出西方辰星居太

白之前相近間可槪劍

蘇林曰槪音函函容也其間可容一劍也

在酉北陰

國有兵謀在酉南陽國有兵謀其不相近兵官有滅者

郝萌曰太白辰星在酉北北國之事也在酉南南國

之事也正在酉則中國之事也正在卯則陽國之事也

荊州占曰有軍太白辰星俱出一方同面異宿客主

人來會敵軍雖近勢未戰宿乃逐不同合各自罷又

曰有軍太白出東方辰星出西方若太白出西方辰星

出東方格野雖有兵軍不戰石氏曰辰星出而與太

白不相從雖有軍不戰 海中占曰辰星與太白合東

方天下兵大起盛而不戰裂地相賂為利 甘氏曰辰

星與太白合為變謀為兵憂

班固天文志曰孝景元年正月癸酉金水合於婺女

其三年吳楚膠西膠東菑川濟南趙七國反軍敗散走又宋書天文志曰孝武大明三年四月金水合於西方時竟陵王謀反遣羽林軍攻戰其應也 荊州占曰太白與辰星相去二

尺若一尺破軍殺將其從前大病從旁小病與太白相薄戰其先起兵凶 又曰辰星與太白相近三四尺於東方辰星二十日不入至三十日東南國有兵不戰

期至春夏有兵 又曰辰星與太白不相近於西方二

十日至三十日辰星不及入西方北國有兵 又曰辰

星與太白相近三尺四尺於西方二十日至三十日軍

戰辰星相遠不戰 郝萌曰辰星隨太白於西方天下

無兵兵起期六月天下有兵客利相去間可四尺客兵

愈相遠不戰兵軍未解辰星退而罷 郝萌曰太白與

辰星合邊有兵

司馬彪天文志曰孝殤元興元年閏七月辛亥水金二星合於一舍其年遼東弱

人反抄六縣發上谷漁陽右北平遼西馬桓討之

石氏曰太白辰星聚於一

舍天下小旱其下之國必以重德致天下守之三十日  
不去其草木皆傷五穀滅亡 陳卓曰太白與辰星舍  
箕用事者坐之 洪範傳曰金水合婺女有變謀為兵  
憂 二十八宿山經注曰太白辰星同守昴不出百日  
趙君為人所囚大臣相戮 荊州占曰太白與辰星合  
太白為主人辰星為客則有兵戰客勝若辰星環繞太  
白大戰主人偏將死抵太白主人大將死 又曰太白  
出辰星從之急相去一尺兵起大戰光芒相及若摩之

其下有數萬人戰客勝主人軍敗 又曰辰星隨太白  
於西方環繞居抵太白居酉北則陰國起兵居酉南則  
陽國起兵期六月兵在外則戰客利 石氏曰辰星來

抵太白不去將死正旗所出破軍殺將客勝

天官書曰  
不出客亡

地視旗所指以命破軍 又曰辰星摩太白左大戰主

人與吏死摩太白右萬人戰主人勝 文曜鉤曰辰星

摩太白入相傾

宗伯曰摩謂光相  
及也傾壞敗也

巫咸曰太白與浼

星闕不出其年國臣反 天官書曰太白與辰星闕必



有大戰客勝主人與吏死 荊州占曰太白與辰星合  
鬪有軍在外大戰流血兵在外則有內亂 春秋緯曰  
辰星圍太白若與鬪大戰過太白間可容劍小戰出太  
白右軍急青角兵憂黑角水流 甘氏曰辰星與太白  
合鬪亢旱 荊州占曰辰星與太白相逢而鬪辰星不  
勝燕趙代有憂 又曰辰星與太白鬪其分有反臣期  
不出三年 又曰辰星與太白鬪太白分散客軍勝秦  
國有憂若辰星分散主人軍勝燕代有憂 又曰太白

環繞辰星若與太白抵觸一尺容劍破軍殺將主人勝  
石氏曰兔星入太白中五日而出反入而上出破軍  
殺將客勝下出客亡地三百里 荊州占曰辰星入太  
白中復出人君死 又曰太白守辰星其國君死 又  
曰辰星從太白相守其間可械劍有數萬人戰其下

唐開元占經卷二十二

欽定四庫全書

唐開元占經卷二十三

唐 瞿曇悉達 撰

歲星占一

歲星名主一

石氏曰歲星他名曰攝提一名重華一名應星一名經星  
天官書曰歲星一名紀星又曰歲星廟也 春秋  
緯曰春精靈威仰神為歲星體東方青龍之宿 石氏

曰歲星木之精也位在東方青帝之子歲行一次十二年一周天與太歲相應故曰歲星人主之象主仁主義主德主大司農主次相其國吳齊主春日甲乙其辰寅卯所在之邦有福石氏曰歲星主顏貌怒喜意所欲施行合誠圖曰歲星主含德洪範五行傳曰歲星

者於五常為仁恩德孝慈於五事為貌威儀舉動仁虧

貌失逆春令則歲星為災

葉班固天文志曰逆春令傷木氣則罰見歲星雖主

福德見惡逆則怒為殃更重淮南子曰東方木也

木入

地而生也

其神太皞

天神五帝太皞主東方

其佐勾芒執規而治春

規者

也

其神為歲星其獸為青龍其音角其日甲乙

荊州

占曰歲星主春農官也其神上為歲星主東維又曰主

歲五穀

又曰歲星主司天下諸侯人君之過

天鏡

曰歲星主春蒼帝之子為天布德 石氏曰歲星所在

之國不可伐可以伐人 甘氏曰邦將有福歲星留居

之 淮南子曰歲星之所居五穀豐昌其對為衝歲乃

有殃 荊州占曰歲星所居之宿其國樂所去宿其國

饑又曰所從野有慶所去起兵 又曰歲星居次順常  
其國不可以加兵可以伐無道之國伐之必剋 又曰  
歲星所留之舍其國五穀成熟 石氏曰歲星君之象  
也 石氏讚曰歲星象主色欲明潤

歲星行度二

洪範五行傳曰歲星以上元甲子歲十一月甲子朔旦  
冬至夜半甲子時與日月五星俱起於牛前五度順二  
十八宿右行十二歲而一周天

案歷法歲星一見三百  
六十三日而伏三十五

日一千三百三十分日之一千一百六十二奇四十五  
復見如初一終三百九十八日一千三百四十分日之  
一千一百六十二奇四十五衆家之說  
皆云十二年而一周天准此微為疎矣

河圖雒書曰

歲星日行十二分度之一十二歲而周天出東方以晨  
入西方以昏 甘氏曰歲星凡十二歲而周皆三百七  
十日而夕入於西方三十日復晨出於東方視其進退  
左右以占其妖祥 甘氏曰歲星所居處安靜中度吉  
天官書曰歲星出東行十二度百日而止反逆行八  
度百日復東行 巫咸曰歲星受制則行柔惠進羣賢

封有功出財貨行賑貸禁開闢通障塞無伐木 尚書

緯曰時五紀氣在於春紀可以觀農桑禁斬伐以安國家如是則歲星得度五穀滋矣政失於春星不居其常

樂動聲儀曰角音和調則歲星常應太歲月建以見

則發明至為兵備

發明金精鳥也金既剋木又兵象也

荊州占曰歲星

居舍進退如度其國有福王者吉姦邪息 又曰人君

治急歲星行疾緩者行遲刻者行陰道寬者行陽道和

者行中道行陽道者早行陰道者水行中道者陰陽調



和 又曰歲星行正則王者心正行邪則人主心邪行  
正者行黃道也行邪者失黃道也 又曰君行寬則歲  
星行陽道多旱王者外其心憂在邊臣封寵無功之人  
甘氏曰凡歲星所在不可伐假令歲星在寅則其歲  
不可東北征利西南西南無年有亂民是為歲星之衝  
常受其凶也十二歲皆放此 荊州占曰歲星歲行一  
次居二十八宿與太歲應十二歲而周天太陰居維辰  
歲星居維宿二太陰居仲辰歲星居仲宿三 淮南子

曰太陰在四仲則歲星守三宿

太陰謂太歲也四仲子午卯酉也假令歲陰在

卯星守須女虛危故曰三宿也

太陰在四鈞歲星行二宿

四鈞謂丑寅為一鈞辰巳

為一鈞未申為一鈞戌亥為一鈞假令歲陰在寅歲星在斗牛故曰二宿也案晉灼曰太陰在四孟四季則歲

行二宿也二八十六三四十十二故十二歲而行二十八宿日

行十二分度之一歲行三十度十六分度之七十二

歲而周 春秋緯曰太陰在亥歲星居角亢太陰在子

歲星居氐房心太陰在丑歲星居尾箕太陰在寅歲星

居斗牽牛太陰在卯歲星居須女虛危太陰在辰歲星

居營室東壁太陰在巳歲星居奎婁太陰在午歲星居胃昴畢太陰在未歲星居觜參伐太陰在申歲星居東井與鬼太陰在酉歲星居柳九星張太陰在戌歲星居翼軫運之常也 甘氏曰歲星處一國是司歲十二名

攝提格之歲

案李巡曰言萬物承陽而起故曰攝提格起也孫炎曰陽攝提提攝萬物使上至

攝提格在寅歲星在丑以正月與建斗牽牛婺女

案天官書

與斗牽牛石氏曰在斗牛太初歷曰在營室東壁淮南鴻烈解曰太陽在寅歲名攝提格其雄為星舍斗牽牛

許慎注曰太陰在天為雄歲星在地為太陰

晨出於東方為日十二月

案淮南鴻

烈解曰以十二月與之晨出東方東井與鬼為對  
許慎注曰東井與鬼在未斗牽牛在丑故為對也夕入

於西方其名曰監德其狀蒼蒼若有光其國有德乃熟

黍稷其國無德甲兵惻惻其失次將有天應見於輿鬼

天官書曰  
應見杓其歲早水而晚旱  
案淮南鴻烈解曰攝提格之歲早水晚旱稻疾蠶不

登菽麥昌  
民食四升甘氏曰單閼之歲  
案李巡曰日在卯言陽氣推萬物而起故曰單

閼單盡也閼止也孫炎曰本單作殫釋  
曰殫猶申也閼壅之物於此盡申也攝提格在卯歲

星在子與虛危  
天官書曰與婺女虛危漢書天文志曰太初歷在奎婁晨出夕入

淮南子曰歲星舍婺女虛危以十二  
月與之晨出東方柳七星張翼對也其狀甚大有光若

有小赤星附於其側是謂同盟兩國或昌或亡死者不

在其鄉其失次見於張其名曰降入周王受其殃國斯

反服甲兵惻惻其歲大水

淮南子曰單閼之歲歲和菽惡蠶昌民食五升

甘

氏曰執徐之歲

案李巡曰言蟄之物皆敷舒而出故曰執徐執蟄也徐舒也孫炎曰勾者畢達

蟄伏之物盡敷舒也

攝提在辰歲星在亥與營室東壁

天官書曰以三月與

營室東壁天文志曰太初歷在胃昴

晨出夕入

淮南子曰歲星合營室東壁以正月與之晨出東方

翼軫為對其名為搏穀

天官書曰青章甚章也

其國有德必數其狀其

失次見於軫

石氏曰失次杓

其名曰青章其國不利治兵將有

大喪其歲早早而晚水

淮南子曰執徐之歲早早晚水小饑蚤開麥熟民食三升

甘氏曰大荒落之歲

李巡曰言萬物皆藏茂而大出霍然落落故曰荒落孫炎曰物長大

荒蕪落莫者也

攝提在巳歲星在戌與奎婁胃

天官書曰以四月與奎婁胃漢

天文志曰太初歷在伐也

晨出夕伏

淮南子曰歲星舍奎婁以二月之晨出東方角亢為對也

其

名曰路嶂

天官書謂之躔踵

其狀態色有光其國兵其君增地

其失次見於亢其名曰清明其下出賊死主是歲不可

西北征利東南無軍有亂民將有兵作於其旁執

殺其主

淮南子曰大荒落之歲有小兵蠶登麥昌菽疾民食二升也

甘氏曰敦牂

之歲

太陰在午歲名攬槍郭璞曰敦牂淮南子注曰則郎切李巡曰言萬物皆茂狀倚移其枝故曰敦牂敦茂

也牂狀也孫炎曰萬物茂狀也

攝提在午歲星在酉與畢昴

天官書曰以五月與

胃昴畢天文志曰太初歷在井與鬼也

晨出夕入

淮南子曰歲星舍胃昴以三月與之晨出東方氐房

心為

其名曰啓明

天官書曰開明一曰天津石氏曰名啓明

其狀熊熊若有

光天下偃兵唯利二立王不利治兵其失次見於房

石氏

曰失次杓

其名曰不祥孽及殷王禍及四鄉其歲早早晚水

淮南子曰攬槍之歲歲大旱蠶登稻疾歲麥昌禾為民食二升

甘氏曰協洽之歲

李巡曰在未言陰陽欲和萬物和合故曰協洽和也孫炎曰物生和洽舍英秀也

攝提在未歲

星在申與觜觿參伐

天官書曰以六月與觜觿參伐天文志曰在張七星

晨出夕

入

淮南子曰歲星含觜觿參以四月與之晨出東方尾箕為對

其名曰張列

天官書曰長列

其狀昭昭若有光其色若赤無有他祥唯利行兵征於

四方仇人不敢治民其失次見于箕其名曰不疑小民

有子持頭相期

淮南子曰協洽之歲有小兵鬻登稻昌穀麥不為民食三升

甘氏

曰泥灘之歲

郭璞曰泥音湯昆切灘音湯干切李巡曰言萬物皆脩其精氣故曰泥灘孫炎曰泥

灘物吐秀傾垂之貌也

攝提在申歲星在未與東井與鬼

天官書曰以七

月與東井與鬼漢天文志曰太初歷在翼軫也

晨出夕

淮南子曰歲星舍東井與鬼以五月與之



晨出東方斗牽牛為對

其名曰大晉其狀昭昭白色有光有國其

亡亦不在其鄉其失次見於牽牛其名曰小章不利治

兵其國有誅必害其王歲小水雨

淮南子曰涖灘之歲歲和小雨行蠶登菽

食三升

甘氏曰作愕之歲

淮南子曰作愕或作噩孫炎曰愕音弩李巡曰在酉

言萬物墜落故曰作愕

作索也愕茂也孫炎曰作愕者物落而枝起之貌

攝提在酉歲星在

午與柳七星張

淮南子曰歲星在柳七星張漢天文志曰太初以八月與柳七星張

亢歷在晨出夕入

以六月與之晨出東方須女虛危為對也

其名為長王其狀

作有芒有國其昌書有四方享獻之祥其失次見於虛

天官書曰應見危  
石氏曰失次杓

其名曰大章有旱而昌或為之殃必

在其鄉其歲有火有女喪民疾

淮南子曰作悞之歲有  
大兵民疾蠶不登栽麦

無穗民食  
五升也

甘氏曰閹茂之歲

李巡曰言萬物皆蔽冒  
故曰閹茂閹蔽也茂冒

也孫炎曰霜閹  
茂物使俱落也

攝提在戌歲星在巳與翼軫

天官書曰  
以九月與

翼軫漢天文志曰太  
初歷在氐房心也

晨出夕入

淮南子曰歲星舍翼軫  
以九月與之晨出東方

營室壁  
為對

其名為天睢其狀白色大明其色若青國有大

疾其失次見於東壁

石氏曰  
失次杓

其國士卿相謫民人各直

刺無有仇謫鬼神書壁其名曰天侈其歲有小水有女

喪

淮南子曰闕茂之歲小熟有兵蠶不登友不為菽昌民食七升

甘氏曰大淵獻之

歲

李巡曰言萬物落於亥大小深藏屈近陽故曰淵獻淵藏也獻近也孫炎曰獻萬物於大深謂蓋藏也

攝提在亥歲星在辰與軫角亢

天官書曰以十月與角亢漢天文志曰太初歷

在尾晨出夕入

淮南子曰歲星舍角亢以十月與之晨出東方奎婁為對也

其名為

大皇

天官書曰大章

其狀色玄青天下不寧有歸為政星若耀

而陰出是謂正平利起軍旅其帥必武有德將四國海

內盡服其失次見於婁其名屏營天下盡驚

淮南子曰大淵獻之

歲有大兵大熟蠶蕃菽民食三升

甘氏曰困敦之歲

郭璞曰敦音頓李巡

曰在子言陽氣皆混萬物芽孽故曰困敦孫炎攝提在  
曰困敦混沌也萬物初萌混沌於黃泉之下

子歲星在卯與氐房

天官書曰以十一月與氐房心  
漢天文志曰太初歷在建星牽

牛

晨出夕入

淮南子曰歲星舍氐房心以九月  
與之晨出東方胃昂畢為對也

其名為

天泉其狀玄色甚明江池其昌不利起兵其失次見於昴

其名曰赤章其國有喪不在其王有水而昌

淮南子曰  
困敦之歲

大霧起大水出蠶登稻  
疾菽麥昌民食三升也

甘氏曰赤奮若之歲

李巡曰  
言陽氣

奮迅萬物而起不若其性故曰赤奮若陽也奮迅也  
若順也孫炎曰物萌色赤奮動順其性而氣始芽也攝

提在丑歲星在寅與心尾箕

天官書曰以十二月與尾  
箕漢天文志曰太初歷在

繫女虛危又曰甘氏太初歷所以不同者以星晨出夕

入淮南子曰歲星舍尾箕以十月與之晨出東方觜觿參為對其名為天昊

黯、然、黑、色、甚、明、侯、王、有、慶、其、失、次、見、於、參、其、名、洋、有、國

其虛其歲早水

淮南子曰赤奮若之歲有小兵早水蠶不出稻小疾菽不為麥昌民食三升

### 歲星相王休囚死三

石氏曰歲星之相也從立冬冬至盡其色精明無芒角

甘氏曰歲星之王也立春至春之盡其色比左角大

而蒼有精光而內實仲春時有芒角 歲星之休也從

立夏至仲夏無光明而赤黃 歲星之囚也從仲夏至  
夏之盡及四季王時其色當青黑止而不行 歲星之  
死也從立秋至秋之盡其色黑而細小不明此歲星之  
常也天下大昌 當其相也而有王色主弱臣強有休  
色相免有囚色相囚有死色相死所留之舍其國大強  
行中度天下和其休相有逆謀不成 當其王而有相  
色主弱臣強有休色人主有疾病之憂有囚色大赦有  
死色有大喪其進舍也有德令其退舍也有還令其所

守之舍其下有逆德 當其休也而有王色所居之舍  
其國受兵有相色其國大臣誅傷有囚色草木傷有死  
色禾豆不入稻芋半傷 當其囚也而有王色政令不  
行下反其上主聽不聽有相色臣下專政六月下霜有  
休色所謀不成有死色誅故貴公卿所居之舍其國有  
禍喪 當其死也而有王色則秋榮華有相色枯木復  
生有休色有土功有囚色有大喪 荊州占曰歲星王  
時當有芒角若無芒角者王者無威勢在臣下

歲星變色芒角四

甘氏曰候歲星以春甲乙此王氣當如其常色變則失所也 甘氏曰歲星如左角之狀其色蒼十二芒蒼比

伐左肩赤比心黃比

闕

大角黑比奎大星

巫咸曰歲

星色青白如灰主有憂期五月兵獄大起青多為獄白多為兵青白等兵獄並起 海中占曰歲星色黃得地

焦貢曰歲星主歲色黃澤有年赤而黑無年 天官

書曰歲星色黃赤而沉所居野大穰 荊州占曰君有



德則歲星潤澤光明君無德則歲星細小不明 歲星  
黃赤潤澤立竿見影大熟人主有喜歲星始正月受歲  
色赤黃潤所居之野大穰其色黃白有爵祿之賞也色  
正白人主死草野素服諸侯皆戒當有兵謀不成色白  
而圓瘁而不光期三十日有喪 歲星色青白是其常  
色赤則主有憂色黃有喜色白為旱喪色黑多疾病一  
有水災歲星色青黑期六十日有喪 歲星色黃白歲  
穰 歲星色青圓為憂赤圓黑圓病不出三十五日大

喪改服 歲星在春其色當蒼黃而光潤澤其變而白

秋有喪變而赤者夏有兵 歲星赤黃而動期九十日

兵若喪色赤黑侯王憂 歲星失色而黃女后持政期

百八十日失色而青黑不出百八十日有大喪 黃帝

占曰歲星在東方之宿色當青色白而角有怒色赤有

兵色黑有喪色黃白歲大熟 歲星在北方之宿色當

黑色白而角有兵色青有憂色白有怒色黃白歲大熟

歲星在西方之宿色當白色赤而角皆為有兵青為

憂黑為喪亦有怒色黃白歲大熟 歲星在南方之宿  
色當赤色白而有角兵青有憂若怒色黑有喜色黃白  
歲大熟 文曜鉤曰歲星色亦有角所居之國昌人主  
以武強戰無芒角不勝色赤黃以反德豐穰君臣和合  
色青白而赤耀其國有乖離之謀大臣發計主有憂懼  
鉤命決曰天子失知則黃龍不見歲星五角 平咸  
曰歲星赤黃角國有喜 海中占曰歲星色蒼黃吉赤  
芒澤有子孫喜立王黃得地白有兵黑有德令 荆

州占曰歲星東行前芒短者欲留之象不出七日留正見南方芒指卯酉子午者此王者正也指西維者不正也 歲星西行前芒短者欲留不出三日留 歲星失

色白耀耀圓而揚赤芒王者誅大臣期九十日 歲星

色青而角有水功事 歲星色赤角則犯我城 歲星

角人主有怒 歲星一角七寸外射者大使大臣出期

九十日三角兵誅期六十日 歲星三角芒傷近臣誅

內將相期百八十日 歲星五角王者自出將兵期百

八十日歲星留不行而芒角有長者是星欲行候隨芒  
角所指如是從之其芒南者星入外宿王者欲遣大使  
之邊國期九十日芒北入中宿者是王者在外欲還也  
不出四十日芒在東者欲順行也不出七日行是天子  
欲出不過五十日則王者出宮其芒在西者欲逆行也  
不出七十日逆行不出四十日王者誅大臣 歲星芒  
邪角不正則王者心不正外邪以應外臣內邪以應后  
夫人 歲星有芒無角則王者心平天下安寧期百八

十日 歲星變色人主有怒若有芒角黑有水青角有  
兵白角死喪若無芒角有軍戰不勝 歲星七角又芒  
者王者與四方戰期不出一年 歲星九角又芒者殺  
賢人誅邊將期一年 石氏曰歲星色白角哭泣之聲  
歲星木用事王東方無芒角是王者內弱威不使臣  
也五寸以內曰芒五寸以上至九寸曰角 天官書曰  
歲星角迎角而戰者不勝

歲星盈縮失行五

五行傳曰歲星超舍而前為盈退舍而後為縮盈其國  
有兵縮其國有憂 荊州占曰歲星超舍而前過其所  
當舍而宿以上一舍兩舍三舍謂之羸侯王不寧不乃  
天裂不乃地動歲星退舍而後以一舍二舍三舍謂之  
縮侯王有戚其所去宿國有憂三年有兵若山崩地動  
雒書雒罪汲曰歲星當居不居未當去而去不言主  
酷暴 詩緯曰歲星無光進退無常此仁道失類之應  
文曜鈞曰歲星所居久其國有德厚人主有福不可加

以兵 石氏曰歲星主仁仁失者罰出變見於歲星歲星盈縮故曰罰出此失政也言歲星所以盈縮之宿乃以仁失逆春氣之所致也以其宿命其國聖人觀歲星所盈縮之宿以知仁失之國也 石氏曰其國失義失春政則歲星贏縮贏則其下之國有兵不居復縮則其下之國有憂其將死國傾敗 又曰歲星當居而不居未當去而去若居之又南北東西翔之搖動不留名曰六排皆陰驚其陽臣下勝其主人主有大憂三公之禍



相以所之宿名其官不舍者懦強邦去之者嬖妃雄動

搖者勢不亾期在衡

案左傳曰魯襄公二十八年梓慎曰今茲宋鄭其飢乎杜預注曰梓慎

魯大夫也傳曰歲在星紀而淫于玄枵注曰歲歲星也星紀在丑斗牛之次玄枵在子虛危之次明年當在玄枵今已在玄枵淫行失次也傳曰蛇乘龍注曰蛇玄武之宿虛危之星龍歲星木也木為青龍失次出虛危下為蛇所乘也傳曰龍宋鄭之星也注曰歲星本位在東方東方房心為宋角亢為鄭故以龍為宋鄭之星傳曰宋鄭必饑玄枵虛中也注曰玄枵三宿虛星在其中也傳曰玄枵耗名也土虛而民耗不饑何為鄭裨竈曰今茲王及楚子皆將死歲星棄其次而旅於明年之次以害鳥帑周楚惡之注曰旅客處也歲星棄星紀之次客在玄枵歲星所在其國有福失次於此禍衡在南南為朱鳥鳥尾曰帑鵠火鵠尾周楚之分故周王楚子受其咎經曰十

有二月甲寅天王崩乙未楚子昭卒往又曰歲星去其  
年宋鄭皆饑則梓慎之占各有其驗也

舍之他舍所去失地所之得地 歲星所居而徙搖前

後左右人主不安 歲星不得其宿其國必亡君 又

曰歲星修仁順則喜逆則怒 甘氏曰歲星所處而不

處其國乃亡既已處之又東西去之其國凶不可舉事

用兵 歲星出入不當其次有天妖見其衝所去國凶

所之國昌 荊州占曰歲星當出不出而去其次凶

淮南子曰歲星當居而不居越而之他處主死國亡

京氏曰樂不興則歲失行人君不行仁恩破胎傷孕

春殺無辜則星失度不救則弟殺兄臣弑君班固曰

政緩則歲不行急則過分逆則占郝萌曰歲星當移

而不移民有憂諸侯四流行不用其道則凶荊州占

曰歲星當居而不居其國失地未當居而居其國得地

期九十日歲星當居其國之宿而終宿不居其野亡

歲星未當居而居之當去而不去既已去復還居之

皆為有福歲星行不至所當舍之宿其國凶又曰不

行其宿其國必亡君 歲星居之安國安居之不安國  
不安 歲星一東一西害侯王人主不安一南一北害  
於黍稷侯王憂移而北旱移而南大水 又曰南北為  
貴賤東西為妖祥 鴻範傳曰佃獵不當飲食不享出  
入不時及有姦謀則歲星逆行變色 春秋緯曰好害  
盛德則歲星逆行 春政亂者奪民時獵野獸則歲星  
逆行 石氏曰歲星順行列宿者天德喜也所守犯中  
外官皆吉有暴貴者星逆行不欲犯列宿中外官者皆

誅 歲星逆行其國不可以興兵星順兵宜進星逆兵

宜退 巫咸曰歲星亂行五穀不實草木秋英 天鏡

曰歲星逆行不軌為殃賊 焦氏曰歲星逆三月二月

有害乃行三舍以上則為害 郝萌曰歲星之行當遲

而疾失一次以上至二次則人主驚走社稷危亡天下

兵起民去其土死者如丘陵 荊州占曰歲星犯守錯

逆其國殃咎若守之滿六十日災必應 歲星變色亂

行主無福

案宋書天文志曰晉簡文咸安二年五月歲星形色如太白占曰進退如度姦邪息變色亂

行主無福歲星自於仲夏當細小而明此其失常也又為臣強七月帝疾甚詔桓溫曰少子可輔者輔之如不可輔君自取之賴侍中王坦之毀手詔使如王尊輔政事溫聞之大怒將誅坦之等是月帝崩王者不行春令興土功作宮室築城隍治溝瀆而奪民時百姓怨嗟則歲星盈當縮順而逆水旱不時當出不出變為妖孽所見之邦大兵起國破主亡王者行義起宗廟立無後賑貧窮存孤寡省刑獄賞有功舉隱伏禮賢良發庫藏罷徭役寬賦歛則星順度無咎矣人君宰相之治也春不勸農民耕種通溝渠治城郭而奪民時百姓

怨謗則歲星盈縮逆行變色而天雨不時有大旱與水  
其無救即天掊出出則殃起主農官及用事者憂君行  
急則歲星行陰道行陰道多水潦王者內其心思在親  
戚功臣不錄 歲星行疾而遲不及其次至二次人主闇  
昏國絕嗣女后持政大夫不服民賊不禁 歲星逆行  
變色其國逐功臣殺太子人主以妾為妻內亂親戚  
歲星逆行不可以戰凶其所去國五穀皆貴 君治逆  
則歲星逆逆行入陰道者內事逆逆行入陽道者外事

逆君治逆不止則星逆行不止 海中占曰主好陰謀  
侵凌諸侯急兵革則歲星逆行

歲星書見六

甘氏曰歲星書見臣謀其主國相有憂及死有白衣事

宋書天文志曰晉惠帝永寧二年四月癸酉歲星書見  
占曰為臣強初齊王冏定京都因留輔政遂專傲無君  
十二月成都河間長沙王又討之交戰及焚宮闕國  
兵敗夷滅之殺其兄上軍將軍寔以下二十餘人

晉陽秋曰孝武太元十一年六月甲午歲星書見在胃

占曰魯有兵臣強十二月慕容釗寇河東崔遼使子寇



陳穎朱序遣討之釗走渡河

歲星變異大小七

龍魚河圖曰夫歲星主德慶其神下為大乙之神 巫咸曰歲星下為壯男止於田野 漢武故事曰西王母遣使謂上曰求仙而先殺戮吾與帝絕矣又致三桃食此可得極壽使至之日東方朔死上疑之問使者曰朔是木帝精為歲星下遊人中以觀天下非陛下臣也上厚葬之一本云朔死乘雲飛去仰望大霧望之不知所

在朔在漢朝天上無歲星 二十八宿山經注曰歲星  
為四彗出於奎婁則邦豐熟和平 考靈耀曰政失於  
春歲星滿偃不居其常 石氏曰歲星德也人主之象  
其角反動乍小乍大若色數變人主有怒又天官書曰  
人主有憂 巫咸曰歲星大其常且賦歛不常民饑  
歲星小民且多疾牛馬疫死 天官書曰歲星大即為  
嘉 荊州占曰歲星始出大而日愈小者所居之國耗  
歲星始出小而日愈大者所居之國利 歲星行宿

大而明內實天下安寧小而內虛其國不安主有憂

歲星流與列星鬪八

甘氏曰歲星流主死失地 巫咸曰歲星沉浮國亡有  
土功爭又曰有憂沉數日不見國亡乍見乍不見國憂  
喪 天官書曰歲星出如浮而沉其國有土功如沉而  
浮其野亡浮者見之沉者伏之 荊州占曰歲星變色  
逆行相凌而鬪舍合留舍環守其國無道

歲星穰氣自暈九

黃帝占曰歲星生氣而為青穰者明日大寒小雨見此者黃魚鹽貴不出三旬 孝經內記曰歲星生氣為青穰者明日大寒小雨見此者魚鹽大貴不出三旬皆可再倍貴不過二十日止所見之國傷苗少實天下有一歲十饑見者不出其年富民從其故鄉王者不安大臣坐事不出二年天下無布練貴縑絮四倍萬民大寒郝萌曰歲星出穰長三尺三日雨若不雨大霧 甘氏曰歲星自暈有喪



唐開元占經卷二十三

欽定四庫全書

唐開元占經卷二十四

唐 瞿曇悉達 撰

歲星占二

歲星犯東方七宿

歲星犯角一

石氏曰歲星犯左角天下之道皆不通犯右角天下王使絕滅 荊州占曰歲星犯角天下有兵將相有憂犯

右角右將憂 石氏曰歲星入角天下有兵其行疾六十日行遲百二十日遠百八十日 黃帝占曰歲星出道天下太平出陽道旱出陰道多雨 陳卓曰歲星出陰道多陰謀 甘氏曰歲星逆行入角人主出入不時若有急事千里之行一曰女子多死 孝經右秘曰歲星在角天下大病 石氏曰歲星乘左角法官誅乘右角大將軍死 郝萌曰歲星乘左角為旱乘右角為水為兵 荊州占曰歲星乘右角為后族家若將相有坐



法死者 郝萌曰歲星居角歲大熟 又占曰歲星守  
角為中兵留兩角間關梁不通軍有興國建邊城境不  
通 石氏曰歲星出入留舍角角為天田歲星來入守  
之其國五穀大熟絲綿為平民大樂守之百日不下國  
有兵 又占曰歲星守角中五穀成熟歲平安樂守之  
百日兵起 又占曰歲星守右角十六日君命衆子  
又占曰歲星守左角七日朝去國有憂去一尺七寸天  
下同心 甘氏曰歲星守角王者大赦忠臣用 海中

占曰歲星守左右角其色黃白小旱民小厲其逆行即  
旱其還立雨糴如故 又占曰歲星犯左右角逆行為  
旱五穀不收 又占曰歲星守角一南一北宜黍與稷  
都萌曰歲星守左右角赦一曰守十餘日有赦不盡  
又占曰歲星守角處其北五穀不收 又占曰歲星  
守角政事急有千里之行 又占曰歲星守角為兵傷  
大臣 荊州占曰歲星守右角有大德令期八十日  
又占曰歲星守右角處其北五穀半收守左角處其南

及守天田有大水五穀不成大饑人相食 石氏曰歲

星犯乘守左角七日以上天下大赦守右角賢士用期

七十日 郝萌曰歲星逆乘陵左右角其為日蝕國有

憂 又占曰歲星犯天庭臣為亂 又占曰歲星守犯

陵右角為禍咎 又占曰歲星舍若食角女子多死

歲星犯亢二

石氏曰歲星犯亢天子之座則敗於君 又曰歲星數

入亢其國疾疫 巫咸曰歲星入亢歲有旱絲綿貴

若守之三十日以上有兵起其年饑人相食 郝萌曰  
歲星入亢行疾國君受弔有大飛蟲驚動人心期在百  
五十日其行遲至難期二百五十日中 又占曰歲星逆  
行亢其君不親政事朝廷多非其人 石氏曰歲星經  
亢朝鄭國有兵 春秋圖曰歲星之亢其年大熟絲絮  
大貴 郝萌曰歲星入亢或東或西去亢一尺若三尺  
地大動期戊己食時 陳卓曰歲星乘亢右星穀物有  
不成者為大兵 郝萌曰歲星逆乘滅亢右星為大人

憂逆乘滅左星天下有奇令 又占曰歲星舍亢為歲  
小有水 黃帝占曰歲星舍亢南地動 郝萌曰歲星  
出入留舍亢六十日不下十月有兵進來守之兵不用  
國有名者死退而守之有客外來者期十月 又占曰  
歲星有留廷中為天下憂 石氏曰歲星守亢年大熟  
天下有大令國有忠臣若守之去一尺七寸星隕 又  
占曰歲星守亢下田豐魚十倍 又占曰歲星守亢處  
其南其歲地動處其東狗生妖處其北米大貴人多徙

處其西馬生妖守東羊生妖若狗生妖也 又占曰歲星

守亢有小兵 海中占曰歲星守亢為地動 又占曰

歲星守亢北貴人多移徙貴人為妖祥多疾一曰大人

流亡 又占曰歲星守亢王者有德令禾稼熟 又曰

封侯有小疾國君受弔飛蟲六畜生非其類為妖有小

賊民多流亡期百五十日若一年 又曰居亢歲旱

郝萌曰歲星守亢天子大令國用忠臣其守七日以上

至四十日國徵大賢王者更政號期百五十日一曰大

赦使行九州 陳卓曰歲星犯天府邊臣為亂 郝萌  
曰歲星守亢左星為燠旱不生一曰多蟲蝗守右星五  
穀以水傷敗一曰有大兵百二十日 又曰歲星守亢  
十日而去國大豐穰庫倉餘 黃帝占曰歲星逆行守  
亢為中兵 甘氏曰歲星犯守亢逆行失其明色王不  
用事

歲星犯氐三

石氏曰歲星犯氐國無儲 荊州占曰歲星犯氐左星

左中郎將誅死犯右星右中郎將誅死皆期三年 郝  
萌曰歲星入氐不出其年有赦 又占曰歲星逆行氐  
其君治宮室過制度 黃帝占曰歲星之氐其歲熟賤  
人有病 郝萌曰歲星乘氐之右星天下有大水大兵  
乘氐之左星天子有自將兵於野 海中占曰歲星居  
氐五穀以旱傷 郝萌曰歲星處氐西歲多饑傷北有  
小賊貴人多徙牛多死其肉殺人南馬多死民多寒熱  
疾 石氏曰歲星出入留舍氐者天庫之星也其國有



急令其歲則太平還而守之其國以兵致天下 又占

曰歲星守氐孽妾有意者若與月合在氐而暈不出四

十日有德令 又占曰歲星守氐王者立后期八十日

甘氏曰歲星守氐君有喜若拜后不出九十日又曰

皇后喜 巫咸曰歲星守氐國大饑人民流亡 又占

曰歲星守氐為民多疾病 郝萌曰歲星守氐南其年

地動 又占曰歲星守氐逆行其君不居其宮 荊州

占曰歲星守氐諸侯人君有來入宮者其行疾期六十

日其行遲百二十日

宋史書天文志曰宋後廢帝元徽三年十月丙戌歲星入氐五年七

月廢帝隕安成王入墓皇既後三年齊受禪

又占曰歲星守氐為后夫人憂

謂東行反還去兩星二尺期一百二十日去兩星一尺期六十日與兩星齊期二十日以赦解之 陳卓曰歲星守氐五穀蟲蝗萬物不成 海中占曰歲星守犯氐成鈞已環繞之其國饑人君失時政令不行

歲星犯房四

石氏曰歲星犯房太子之身居其所避之九十日 郝

萌曰歲星入房三道為天子有子 又占曰歲星入房  
十日成鈞已者為天子惡之以赦解之又曰為后夫人  
喪過房東行復還反也 又占曰歲星入房更令期百  
二十日 荊州占曰歲星入房五穀豐治太平民無疾  
殃有德令期四月 郝萌曰歲星居房南歲多旱五穀  
以旱傷居房北多水五穀以水傷又曰在房北為大水  
其國舟楫相望 又占曰歲星處房南民多寒熱病處  
房北牛多死其肉殺人東馬多死西饑傷 黃帝占曰

歲星舍房玄色不明有喪又曰大水 郝萌曰歲星與

房合兵戰滿野又曰有白衣之會 荊州占曰歲星中

犯陵房國君憂色青憂喪色赤憂兵積尸成山色黑有

將相誅色白有芒角大哭 黃帝占曰歲星守房七日

不出有崩王十五日不出兵大起 石氏曰歲星守房

有白衣會發男也 又占曰歲星守房其國多禍殃吏

民相傷大臣將滿道而行 又占曰歲星守房為大人

憂以赦解之 又占曰歲星守房在南牛馬無羈縻

又占曰歲星守房五穀豐熟 甘氏曰歲星守房天下

和平 海中占曰歲星守房他國有獻馬者魚鹽十倍

郝萌曰歲星守房天倉倉虛空 又占曰歲星守房

為人主無下堂 又占曰歲星守房為天下諸侯相謀

慮道不通 又占曰歲星守房為邊兵發 又占曰歲

星守房為大饑人相食死者不葬 又占曰歲星守房

大赦

案宋書天文志曰魏景元四年十月歲星守房占曰將相有憂明年正月大尉鄧艾司徒鍾會並誅滅

特赦益土咸熙二年秋又大赦

荊州占曰歲星守房王者心平百姓

得情 荊州占曰歲星守房有反臣大人喪天下易王

黃帝占曰歲星行房南若犯守之為大旱行房北犯

守之為大水 東官候曰歲星犯守房去復還色不明

成鈞己國有喪白衣之會 郝萌曰歲星中犯乘守房

右驂若右服其大人死所中將相誅

案司馬彪天文志曰孝明永平十六

年正月丁丑歲星犯房右驂北第一星不見辛巳乃見房右驂為貴臣歲星犯之見誅是後司徒邵穆與阜陵

王延交通逆謀自殺

郝萌曰歲星逆留犯守乘陵房左右驂主

崩臣有陰謀逆行乘陵中道天子失位而亡順行乘陵

中道天下平和 又占曰歲星不入房中正道其君不  
居明堂一曰不敬明堂 韓陽曰歲星犯房鈎鈐王者  
憂 郝萌曰歲星犯乘鈎鈐大臣有誤天子不尊事天  
者致火災於宗廟中王者不宜出宮下殿有謀匿於宗廟  
中者 海中占曰歲星守鈎鈐天下饑三年 荊州占  
曰歲星守鈎鈐去之三寸王者失政宮門不開近臣起  
亂

歲星犯心五

石氏曰歲星近心七寸以內有暴貴者不出百八十日  
仰觀占曰歲星犯心所當之國戰不勝一曰將軍鬪  
死海中占曰歲星犯心天子星王者絕嗣犯太子太  
子不利犯庶子庶子不利 石氏曰歲星經心清明

烈照天下內奉明王帝必延年 黃帝占曰歲星至心

正不失道天下和平軌道失綱災變生 東官侯曰歲

犯犯庶子星庶子有憂不出百八十日 郗萌曰歲星

不入明堂正道其君不敬明堂一曰不居明堂 郗萌



曰歲星入心天下諸侯有慶賞之事期九十日 荊州

占曰歲星入角守氐之心滿二十日以上期不出一年

之中且有立王其所行者無不利也行疾則治肅行遲

則失職 石氏曰歲星乘心北其國旱室廟有焚者南

出行疾有兵起 石氏曰歲星乘心其國相死 海中

占曰歲星居心多旱五穀以旱傷 又占曰歲星合心

玄色不明有喪 齊伯五星占曰歲星出入留舍心之

上春夏糴貴秋冬平價二十日不下冬兵大起負海大

敗六十日不下天下有急令 春秋緯曰歲星守心天子有慶賜 援神契曰歲星守心年穀豐 石氏曰歲星守心王者得天心陰陽和天下大豐五穀成熟有慶 賜賢士用皆有令德 巫咸曰歲星守心有火異 又占曰歲星守心萬物五穀不成吳楚其齊倍 郝萌曰歲星守天司空貴人多病死 又占曰歲星守天司空土功起 又占曰歲星守心東馬多死其肉殺人守心西萬物不成多饑傷守心南多寒熱病守心北牛多死

其肉殺人 荊州占曰歲星守心七日以上至七十二

日名曰母覆其子陰陽和平王者得天心忠士皆用四

夷服天下安 黃帝占曰歲星逆行守心環繞成鈞已

為大人忌之期六月故赦以解之 甘氏曰歲星犯守

心內禮臣欲謀主若旱有土功春夏糴貴秋冬糴賤若

守之六十日不下有急令 石氏曰歲星犯乘守心大

凶 郝萌曰歲星犯乘守心明堂為大人憂近期十月

遠期三年 又占曰歲星犯乘守心明堂為內亂臣欲

殺主有亡國近期一年二年三年遠期二十八年 又  
占曰歲星犯乘守太子星者太子憂不死則去 又占  
曰歲星犯乘守太子星女主勢行 石氏曰歲星中犯  
乘太子位太子憂犯少子位少子憂 又占曰歲星中  
犯乘守心明堂在陽為燕在陰為外 巫咸曰歲星中  
犯乘守心明堂為大戰不勝將軍鬪死 郝萌曰歲星  
中犯乘守心明堂為萬民備火近期一年中期三年遠  
期九年一曰天下旱 又占曰歲星犯乘心明堂大臣

當之海中占曰歲星留逆犯守乘陵心者王宮內賊  
亂臣下有謀易主者天子權在宗家得勢大臣

歲星犯尾六

石氏曰歲星入尾天下諸侯有慶賀之事期九十日

巫咸曰歲星入尾王者賜后宮立太子若后族有陞顯  
者不出百八十日東官候曰歲星入尾妾為嫡臣專  
政賣權災為起郝萌曰歲星逆行而宿尾天子淫佚

又占曰歲星處尾旁旱水又占曰歲星舍尾處其

東冬龍馬多死處其北牛多死肉殺人處其西傷穀處其南民多寒熱政急海中占曰歲星出入留舍尾五  
十日不下天下一國有大臣亡者齊伯五星占曰歲  
星出入留舍尾尾者燕之星也其國則以義致天下三  
十日不下大亂河圖曰歲星守尾三十日有逆殺上  
者兵起車馳甘氏曰歲星守尾人民為變大臣作亂  
有反逆從大將家起若中有讒諛臣期二十日若卿當  
之又占曰歲星守尾穀大貴人民歸食又占曰歲

星守尾三十日王者立貴后夫人若生太子欲封寵后族  
郝萌曰歲星守尾為用事者當之天下牢開大赦  
巫咸曰歲星守尾旱 郝萌曰歲星守尾成鈎己夫  
人女君死亡 玄冥占曰歲星守尾王者賜后宮立太  
子甘氏曰歲星入尾而守之人主以嬪為后政在臣  
下期四十日 郝萌曰歲星犯守尾為女主夫人妃后  
惡之 又占曰歲星留逆犯守乘陵尾皇后有珠玉簪  
珥惑天子者誣讒大起后相貴臣誅宮人出走兵起宮

門

歲星犯箕七

春秋緯曰歲星犯箕中天下大亂兵大起 郝萌曰歲星犯箕女主宮人有憂 郝萌曰歲星犯箕為天下大赦 石氏曰歲星入箕天下大亂其中有一星民莫處其室養者星在箕南旱在北有水箕踵者歲熟 巫咸曰歲星入箕中伺其出日而數之皆如期二十日兵發伺始入處數之率一日期十日軍罷 郝萌曰歲星入



箕糴價三倍

又占曰歲星入箕中行病宮中有口舌

相讒事期五十日若百二十日

荊州占曰歲星入箕

盜大起多鬪死者歲不熟 石氏曰歲星出箕穀大貴

天下大旱饑死過半

郝萌曰歲星逆行入箕中其君

淫佚

春秋圖曰歲星之箕年多風

郝萌曰歲星出

入留舍箕箕者燕之星也歲星守之其國以武致天下

六十日不下其燕且有為致天下也

又曰歲星居箕

多旱

春秋緯曰歲星守天司空歲水

甘氏曰歲星

守箕多惡風有旱災其國大饑人相食 郝萌曰歲星  
守箕東歲熟南小穰熟北大穰西饑 郝萌曰歲星守  
箕貴人多死病 又占曰歲星守箕為其歲水 又占  
曰歲星守箕則多土功 又占曰歲星守司空大臣衛  
守 東官候曰歲星留守箕七日以上去之七尺以內  
貴女有尊進者

唐開元占經卷二十四